

## **Efesus Kimbi** **Polnön Efesus yeᅅgöra Kimbi alök.** **Jim-asa-asari keu**

Polnön Rom sitigö kösö mire tata Efesus urumelen kambu yeᅅgöra Kimbi ki ohoyök. Efesus mi Eisia prowinsgö siti bohonji. Siti miangö uruᅅe kölköl-örörö gwötpuk ahömalget. Polnön misin nup memba liliköi indimji karöbut ahiga Efesus kaba yambu karöbut miangöreᅅ Buᅅa keu jiba malök. Efesus sitinön Juda ambazip tosatji miri tonji yeᅅgö sutᅅine malgeraᅅgöra Polnön kimbi ki ohoba kewö kusum enᅅiyök, “Kraistnön lök kambu yahöt toroᅅeiga urumelen kambu mohok-kun akzahot.” (2.15-16), (3.6) Anutunön jitsihitji aka kalem möriamji urumelen kambu nengöra denöwö ali ahözawi, mi gwötpuk jim asariza. (3.10) Miangö dopkeu karöbut kewö jiyök:

1. Urumelen könagesö enön sile sep busu mohot aketka Kraistnön nanᅅak nöropᅅini akza. (1.23; 4.15-16)

2. Urumelen könagesö enön miri mohot tandök aketka Kraistnön enᅅö tandöᅅini kömbönaᅅi akza. (2.21-22)

3. Urumelen könagesö enön ambi buᅅa ewö aketka Kraistnön apᅅangö tandök akza. (5.25-27) Mewöyök Kraistnön Efesus enᅅö kambu yahöt toroᅅem etkiiga miangöra sile sep busu mohot akze. Asakᅅangö ambazip akerangöra malmalᅅinaᅅgö goro keuᅅi keuᅅi ohoyök. Mewö.

## **Buk kiangö bahöŋi bohonŋi 4 mi kewö:**

Keu mutukŋi keu 1.1-2

Kraist aka urumelen könagesö 1.3-3.21

Kraistpuk malmal dölokŋi 4.1-6.20

Kimbigö keu kötŋi bohonŋi 6.21-24

<sup>1</sup> \*Anutunöŋ Pol ni jitsihitŋangö dop melaim niŋgiiga Kraist Jisösgö aposol akzal. Mötnarip alaurup sarakŋi Kraist Jisösbuk qekötahöba Efesus sitinöŋ maljei, nöŋön embuk keu eraum mötpingöra kimbi ki ohozal.

<sup>2</sup> Anutu Iwinini aka Kembu Jisös Kraist yetkön mönö kalem möriam enŋiyohotka luainöŋ malme.

### *Kraistnöŋ Anutugö kötumötuetŋi neŋgimakza.*

<sup>3</sup> Neŋön Kembunini Jisös Kraistkö Iwi Anutuŋi möpöseimakin. Yaŋön nini Kraistpuk qekötahöinga uruninan ölöwakŋapaköra Suep mirigö kötumötuetŋi aka kalemŋi könäŋi könäŋi mi urunine alöha kayambu asuhui mala kotket.

<sup>4</sup> Anutunöŋ nini mutuk möpŋangö möpŋeyök kewö akingöra möwölöhöm neŋgiyök: Kraistnöŋ nam köl neŋgiiga neŋön yaŋgö buŋaŋi sarakŋi aka Anutugö jemesoholŋe keunini qahö kinbin. Mewö möwölöhöm neŋgiba miangö andöŋe Suep gölme miwikŋaiba al etkiyök. Nalö miangörenök könahiba ambazip jöpaköm neŋgiba mala korök.

<sup>5</sup> Jöpaköm neŋgiba urusihimŋangö dop qeljŋe keu jit areŋi ala keunini kewö jim teköyök: Jisös Kraistnöŋ nam köl neŋgiiga Anutunöŋ neŋgömeiga nanŋi nahönböratuŋi akin.

---

\* **1:1:** Apo 18.19-21; 19.1

<sup>6</sup> Wölböt Nahönñi nengöra melaiiga eta Anutugö kalem möriamñangö kukösumñi bunabunañambuk kölenđa söngöröñi qahö öne nengiyök. Nini mönö kalem möriamñi miangöra Anutu möpöseim wañgimakin.

<sup>7</sup>\*Anutugö kalem möriamñangö köwenji mi keta bölökñi. Miangö dop Jisösnöñ sepñi mokoba miangön sohopnini meyök. Mi meyoñangöra Anutunöñ ölop singisöndoknini mosöta sañgoñ nengimakza.

<sup>8</sup> Yañön kalem möriamñi mi köwenyök kelenmalelenj mokoiga qaknine öngöyök. Mötkutukutuñi öngöngöñi pakpak miangö dop kewö möt asarim nengiyök:

<sup>9</sup> Anutunöñ mutuk nanñi uruñe keu areñ jöhöba möri ölöwahiga tölapñe ahöi öne mala kotketmö, Kraistnöñ Anutugö keu jitñangö dop wuatangöba eta nengöreñ indeliga eka mörin.

<sup>10</sup> Anutunöñ mutuhök kalem möriam areñangö könañi kewö mötmöriyök, “Anutu nöñön areñ mi wuatangöba mala malbiga nalöñi törörök kam kuñguiga miangöreñ ölnambuk aiga kewö asuhuma: Körek Suep mirigö jakenji jakenji miangöreñ me gölmenöñ ahuba maljei, nöñön mönö mi pakpak mindiriba jöhöm engimam aka Kraist kuñgum wañgibiga körek yenjö bohonñini mohot aka malma.”

<sup>11</sup> Anutunöñ mutuhök nanñi uruñangö dop keu jöhöi ahözawi, mönö areñ miangö dop kuñgukuñgu keuñi jiiga yuai pakpak asuhumakza. Nanñi areñi miangö dop qeljine Juda könagesö nini nanñi bunañi aka malbingöra jim teköba al nengiyök.

---

\* 1:7: Kol 1.14

Miangö dop nini tosatŋan Kraistpuk qekötahöinga meköm neŋgiiga buŋaŋi börösamot ewö aŋgön köla memba maljin.

<sup>12</sup> Juda könagesö neŋön Kraistnöŋ galöm köl neŋgimapkö mamböta qeljiŋe jörömqöröm ak waŋgiba mala korini, yaŋön nini Anutugö kukösumŋi buŋabuŋaŋambuk möpöseiba malbingöra aka möwölöhöm neŋgiyök.

<sup>13</sup> Kian kantri eŋgöreŋök tosatŋan mewöyök Kraistpuk toroqeba qekötahöget. Amötqeqegö Ölöwak Buŋaŋi jigetka keu ölni mi möta uruŋini melenget. Uŋa Töröŋi yaŋön Anutu buŋaŋaŋgö muŋgem aiwesökŋi akza. Uŋa mi melaii etmapkö keu jöhöyöhi, yaŋön mönö mi uruŋine ali geyök. Kraist möt narim waŋgigetka Anutunöŋ aiwesökŋi kömbönaŋi mi mekötahöm eŋgiiga malje.

<sup>14</sup> Anutunöŋ könagesöurupŋi Suep Buŋa neŋgimamgö keu jöhöyöhi, mi memingö aiwesökŋi Uŋa Töröŋi mi mutuk al neŋgiyök. Uŋa Töröŋi urunine ali maljawangöra mönö kewö möt köhöizin: Anutunöŋ lök sohohnini memba buŋaurupŋi ahinga bian gölmenöhök neŋguaŋgiriga Suepnöŋ öŋgöba oyaenköyaen akin. Miangöra mönö Anutugö kukösumŋi buŋabuŋaŋambuk möpöseimakin. Mewö.

*Polnöŋ Anutu möpöseiba kewö köuluköyök:*

<sup>15</sup> Mewö oyaenköyaen akingöra aka nöŋön Efesus eŋgöra köulukömakzal. Eŋön Kembu Jisös pöndaŋ möt nariba ambazip sarakŋi pakpak uruŋinan jöpaköm eŋgimakzei, tosatŋan miangö buzup keuŋi jigetka möral.

16 Mianğöra buzup keu mi mörali, nöñön mewöyök engöra aka Anutu möpöseiba mala qahö mosöral. Qahö. Nöñön köuluköba mianğöreñ mötmörim engimakzal.

17 Mötmörim engiba Kembunini Jisös Kraistkö Anutuñi mi kewö köuluköm wanğimakzal, “O Iwi kukösum Tonji, gi mönö Uñagi Töröñi Efesus alaurup engiman. Uña mi uruñine alnönga mötkutukutuñini qainñi kun asuhuiga Anutugö könañi ölöññanök indeliga möt yaköme.

18 Anutu, gi mönö uru jeñini mem asarinönga nangi Buñagahö könañi möt yaköme.” Anutunöñ nanñi ambazip sarakñi nengöra Suep Buña kukösumñi buñabuñañambuk mi nengimamgö keu jöhöiga inñi yuai mi asuhumapkö al mamböta jörömqöröm akñegöra engoholök. Jörömqöröm aketka Jisösnöñ kunbuk asuhuiga aködamunñinambuk akñei, inñi oyaenköyaen mianğö könañi möt sölöñgömegöra köulukömakzal.

19 Möt narim wanğiinga Anutugö kukösum köhöikñan urunine sehiba nup memakzawi, mianjön mönö keta bölökñi teteköñi qahö akza. Inñi mianğö könañi möt kutumegöra köulukömakzal. Ösum-mumuñi wewelipñambuk mianjön silenini kutuba inahöm nengimakzawi, Anutunöñ mianğö kukñi kewö kondel nengiyök:

20 \*Anutunöñ kukösumñi nupnöñ ala Kraist mem gulim wanğii kömupnöñhök wahörök aka wanğiriga Suep mire öngöba selñi selñi liliköba jakeni jakeni enğonğiriga Anutunöñ böröñi öñje dum tatat mutukñe ali tatza.

---

\* 1:20: Sum 110.1

21 Ali jakömbuak dumņe tata öröyuai pakpakö bohonina kinja. Bem suahö galöm aka yengö nemböņine jembon pom aka gawman kiap öngöngöņi eretņi kukösumņinambuk kembu ak neņgimakzei, Kraistnöņ mönö mi körek pakpak galöm köl eņgimakza. Suep mire, gölmenöņ aka mietkö sutņire galöm qet pakpak qet eņgigetka bisizei, Kraistnöņ mi körek eņgoņgita öngöza. Gölmegö nalö kewöņeyök qahöpmö, könangep nalö qainņi kun asuhuiga mal öngöbini, miangöreņ mewöyök öröyuai pakpak galöm köla mal öngöma.

22 \*\* Anutunöņ uņa, ömewöröme, ambazip aka öröyuai pakpak mi memba eta Kraistkö bapņe al neņgii malinga Kembunini öngöngöņi akza. Anutunöņ Kraist mi urumelen könagesö neņgiba bohonini kinmapköra kuņgum wanņiiga malja.

23 Yaņön kötal neņgiba bohonini aiga neņön yangö ölnaņgö köna börö su-urupņi akzin. Kraistnöņ nörowök aiga qahö dop kölbawakmö, neņön yangö törömunņi aka toroqeinga ölnan asuhum tiņgiriga dop kölja. Kraistnöņ mewöņanök öröyuai pakpakö törömunņina kun aka toroqeiga körek pakpak mienön mönö Anutugö aködamunņinambuk asuhuba dop köla anakze. Mewö.

## 2

*Köhömuneyök guliba Kraistpuk köhöiba maljin.*

1 \*Mutuhök köna oņgita siņgisöndokņi siņgisöndokņi akeranğöra malmal köhömunņi mala kotket.

---

\* 1:22: Sum 8.6    \* 1:22: Kol 1.18    \* 2:1: Kol 2.13

2 Injini nalö mianğörej gölmegö ahakmeme bölöni wuatangöget. Ömewöröme yengö Kembuñinan nalö kewöñe Suep gölme sutñire mala qeçetal ambazip uruñini sölölöhöba galöm köl enğimakzawi, mönö yangören qekötahöba tem köl wañgiba malget.

3 Neñön körek mewöñanök mutuk yengö sutñine silebile aka lañ malin. Uru silegö sihim kömböñañnini bölöni wuatangöba nanine imbi- imbi malin. Mewö lañ malinga Anutunöñ neñgehi qahö dop kölga irimsesewölñi qaknine ali malin. Qeçetal ambazip tosatñi yengö dowök Anutugö irimsesewölñangö buñaya aka malin.

4 Mewö malinmö, nalö kewöñe mewö qahö. Anutunöñ ak-kömükömuñi teteköñi qahö mianñön mönö jöpaköm neñgiyök.

5 Köna onğita Anutu qetala mianğöra köhömuñi aka malinmö, Anutunöñ Kraist mem guliyöhi, nini mewöyök mönö mewöñanök mem gulim neñgiiga köhöiba maljin. Yangö kalem möriamñan mönö amöt qem enğiiga kunbuk letotket.

6 Kraistnöñ wahöröhi, nini mewöyök mönö mewöñanök neñgömindüiga köhömuñeyök wahörin. Anutunöñ Kraist Jisös wañgiriga Suep mire öngöyöhi, nini mewöyök mönö mewöñanök Suep malmalgö jake ahözei, mönö mianğörej al neñgiiga yambuk tosatñi galöm köl enğiba maljin.

7 Anutunöñ kewögöra mewö al neñgiyök: Anutunöñ kalem möriamñangö köweni teteköñi qahö mianñön aukñe asuhui möt asaribingöra mörök. Möt asariba könangep nalöñi nalöñi qainñi kun asuhugetka teteköñi qahö mal öngöbini,

nalö mianğörej mi neŋgim qarimapköra mörök. Anutunöŋ Kraist Jisös melaiiga kaba urukalemŋi mewö kondel neŋgiyök.

<sup>8</sup> Anutu möt narim wangigetka kalem möriamŋan mönö amöt qem eŋgiiga kunbuk letotket. Nanŋini nam köl aŋguba mewö mianğön qahö letotketmö, Anutunöŋ mi kalemŋa ak eŋgiyök.

<sup>9</sup> Nanŋinak yuai kun ak sorokögeraŋğöra aka qahö letotket. Kunöŋ kun nanŋi silenji memba öŋğöbapüköra mönö kalem möriamŋaŋğörök aka mewö ak eŋgiyök.

<sup>10</sup> Nini Anutugö börösöwöya maljin. Kraist Jisösbuk qekötahöinga Anutunöŋ uru dölökŋi miwikŋaiba al neŋgiyök. Anutunöŋ qeljine nup ölöŋŋi ölöŋŋi möwölöhöba mözözömgöyöhi, neŋön mi memba malbingöra mewö miwikŋaim neŋgiiga maljin. Mewö.

*Kraistpuk qekötahöba ölni mohot akzin.*

<sup>11</sup> Mianğöra aka Efesus inini mutuk Juda ambazip qahö ahuba Anutugö könagesö qahö malgeri, mönö mi mötmöriba malme. Tosatŋan eŋğöra kewö jiba jim eŋgimalget, “Nini Anutugö aiwesökŋinambuk maljinmö, kantri tosatŋi inini ambazip omaŋi aiwesökŋini qahö!” Qet mi azi börönöŋ aiwesök silenine yandimakzei, mönö mi mötmöriba jimalget.

<sup>12</sup> Inini nalö mianğörej uruŋini Kraistpuk qahö jöhöba öne yaigep malget. Kian kantri inini Juda könagesö neŋğö kau likepurupnina malget. Anutunöŋ ambazip nanŋaŋğöra möwölöhöm neŋgii maljini, inini neŋğö sutnine qetŋini qahö malget. Anutunöŋ Buŋaŋi alaurupŋi eŋgimamgö



jiba keu jöhöyöhi, injini mi qahöpmahöp möt kutuba tönpin malget. Oyaenköyaen akingö jörömqörömñini qahö. Anutuñini qahö tandök gölmenöñ önewat lañ malget. Mönö mia mötmöriba malme.

<sup>13</sup> Injini mutuk tikep malgetmö, Kraist Jisösbuk qekötahögetka sepñan sañgoñ enñgiiga nalö kewöñe amqeba Anutugö kösutñe kaba malje.

<sup>14</sup> Kraistnöñ nanñak luai Tonini akza. Yañön Juda könagesö aka kian kantri ambazip kambu yahöt nini mindirim nenñgiiga kutulangömakzin. Sutnine kerök ahöba sel paset köhöikñi ewö mendenñ nenñgiyöhi, yañön mönö soñgo mi tumbaköba luluñniga urumelenñ könagesö mohot akzin.

<sup>15</sup> \*Jisösnöñ nanñi gölme silenñan kömuiga mewö mianñön Juda nenñgöreñ Köna keu aka miangö jöjöpañ keuñi aka jimkutukutu tosatñi mi köndenñök. Sile kambu yahöt mindirim nenñgiba könagesö dölökñi mohot akingöra mi köndenñök. Miangöra uru dölökñi miwikñaiba al nenñgiiga Kraistpuk qekötahöinga sutnine luai qei asuhum nenñgiyök.

<sup>16</sup> \*Kraistnöñ kömumba keröknini maripomnöñ qem kömui erök. Silenñi mohot miangö sepñan mönö ambazip kambu yahöt nenñguañgiriga ölop lilingöba Anutugö kösutñe kabin. Mewö mindirim nenñgiiga ölop böröqeqe akin. Mi ak teköba Kraistkö ölni mohot aka maljin.

<sup>17</sup> \*Kraistnöñ kaba luai asuhumapkö Buñañi mi kian kantri ambazip Anutu andö qeba tikep mal-

---

\* 2:15: Kol 2.14    \* 2:16: Kol 1.20    \* 2:17: Ais 57.19

geri, engöra jim asarim engiyök aka Juda ambazip Anutugö kösutje malini, mönö neנגöra mohot jim asarim neנגiba malök.

<sup>18</sup> Kraistnöň Juda aka kian kantri ambazip nini körek nam köl neנגiiga Uňa Töröňi mohotňan kõna kondel neנגiiga ölöp amqeba Iwigö jemesoholňe aňgotpin.

<sup>19</sup> Mianğöra injini Juda ambazip qahöpmö, töndup kian ambazip qandakñi mi qahö toroqeba malje. Anutugö miri gölme toni sarakñi aketka nembuk mohotňe Anutugö urumelenj kõnagesö akzin.

<sup>20</sup> Kezapqetok ambazip yeňön mutuhök Anutugö keunöň tandö esim kuňgugetka Kraist Jisösnöň nanñak kaba tandö kömbönañnini aka aposol melaim neנגiba bohonini kiniga Anutugö urumelenj jikeya akzin. Injini mewöyök tandö mianğöreň aňgota nanğönaňgö ak aňguba köhököhöi miwikñaimakze.

<sup>21</sup> Yanön mönö miri mi jömukñanök mindirim jöhöiga kinakza. Nini Kembubuk qekötahöba kinda kutulaňgöinga mötnaripninan köhöim qariiga Anutugö urumelenj jike kömbukñi akzin. aka

<sup>22</sup> Injini mewöyök Kembugöreň qekötahöba urumelenj alaurup tosatñi yembuk kutulaňgöba mohotňe kinda uruñini nanğöm aňguba köhököhöi miwikñaimakze. Mewö kinda Anutugö urumelenj jike aketka Uňa Töröňi uruñine ala mianjön nanñak jikenj mianğö uruñe malja. Mewö.

### 3

*Polnöň kian kantri yeňgöreň anda Buňa nup meyök.*

<sup>1</sup> Kōnaŋi miangōra aka Pol nōŋōn kian kantri ambazip inini baukōm engimangōra nup memba maljal. Mewō malbiga Kraist Jisōsgō nupŋi mealangōra kōsō mire al niŋgigetka tata simin kōla kōulukōmakzal.

<sup>2</sup> Anutunōŋ kalem mōriamŋi kantri tosatŋi engōra menden engiiga ölōwakŋegō nup niŋgiyōhi, inini mi ölŋa mōt tekōze.

<sup>3</sup> Anutunōŋ keu areŋi tōlapŋi indela jūiga mōt yakōzali, keu miangō kōnaŋi lōk törōpŋanōk ohom engial.

<sup>4</sup> \*Ohom engiali, inini kulem mi oyoŋda ölöp nōŋgō kōnani kewō mōt asarime: Nōŋōn Kraistkō kōnaŋi tōlapŋi mi ölöpŋanōk mōt kutuzal.

<sup>5</sup> Mōpŋangō mōpŋeyōk ambazipnōŋ kōnahiba mala kota malgeri, yeŋōn nalō miangōreŋ Buŋa tōlapŋi miangōra tōnpin malget. Mewō mala kotketmō, nalō kewōŋe Uŋa Tōrōŋan mi Anutugō aposol aka kezapqetok ambazip tōk-kutukutuŋi nengōra jim indeli mōtzin.

<sup>6</sup> Buŋa tōlapŋi mi kewō: Kraist Jisōsnōŋ Buŋa nengimapkō jiba keu jōhöyōhi, inini mi Juda nembuk örörōŋ angōn kōla memba malje. Ölōwak Buŋanōŋ miangō kōnaŋi mi kian kantri ambazip engōra mewōyōk kondel engimakza. Inini uruŋini melenŋa ölöp nembuk mohotŋe kōtumōtuetŋangō Buŋaŋi dop mohot memba malje. Uruŋini Anutubuk jōhöba mohotŋe Kraistkō ölŋi aka nembuk kambu mohot kinjin.

<sup>7</sup> Yangō kukōsumŋan mōnō nōŋgō uruni sölölöhōiga uruni melenŋbiga Anutunōŋ kalem

---

\* **3:4:** Kol 1.26-27

möriamni söngöröni qahö niŋgiyök. Mi niŋgiiga köna asuhuiga Ölöwak Buŋagö nup meme azia ahal.

<sup>8</sup> Nöŋön Anutugö könagesö sarakni pakpak engö nembö bapŋine eretni kötökni maljal. Mewö maljalmö, Anutunöŋ töndup kalemni öngöngöni kewöni niŋgiyök: Nöŋön Kraistkö oyaenköyaen Buŋani mi kian kantri ambazip engöra jim asari-mangö simbawon mötzal. Oyaenköyaen miangö könaŋi mi körek esiba möt kutum teköbinaŋgö dop qahö.

<sup>9</sup> Anutunöŋ möpŋaŋgö möpŋe yuai pakpak mi-wikŋaiba Buŋani tölapni közamböriga ambazipnöŋ mala kota malgetka nalö miangören tönpin malget. Miangöra nöŋön Anutugö Buŋa aren tölapni mi galöm köla malbiga ölnambuk ahakza. Nöŋön miangö könaŋi aukŋe jibiga ambazip körekŋan möt sölöngömegöra simbawon mötzal.

<sup>10</sup> Anutunöŋ mötkutukutuŋi qainni kun könaŋi könaŋi indel neŋgiiga nalö kewöŋe urumelen zioz kambu sutnine eraum möringa aukŋe ahum sehimakza. Anutunöŋ urusihimŋan kewö mörakza: Bem suahö galöm aka pom garata öngöngöni eretni Suep gölme sutŋire öroyuai pakpak galöm kölakzei, yeŋön mewöyök Anutugö mötkutukutuŋi mi kezap ala mötmegöra mörakza.

<sup>11</sup> Yeŋön mi mötmegöra Anutunöŋ Buŋa areni mi möpŋaŋgö möpŋeyök nalö qahöpŋe uruŋan jim köhöiba ali ahöyök. Miangö dop Kembunini Kraist Jisös melaiiga ölni miwikŋaiiga könagesöurupni aka mindiriba kinjin.

<sup>12</sup> Kraistpuk qekötahöba kinda möt narim waŋgiinga Anutugö naŋuŋan mewö taliga ölop

yangö jemesoholne angotpingöra awösamkakak kinjin.

<sup>13</sup> Mianğöra kewö ulet engizal: Nöñön kösö mire tata enñon ölöwaknegöra aka köñjilin möta malakzali, mianğöra uruñinan mönö kude etma. Injini nöngö sihimbölöni mianğöra aka ölop aködamunñinambuk akñe. Mewö.

*Polnöñ Efesus yengöra kewö köuluköyök:*

<sup>14</sup> Könañi mianğöra nöñön Iwinini simin köl wañgiba köulukömakzal.

<sup>15</sup> Yanönök mönö iwinini mutukñi akza. Yangö dop Suep aka gölmegö könagesö pakpak neñön iwi qet memba qerakzin.

<sup>16</sup> Kewö köulukömakzal, “Anutu, gi mönö Uñagi Töröñi al enginönga uruñinan köhöimakña. Göhö Buñagi kukösumñi buñabuñañambuk mi teteköñi qahö köwege ahözawi, gi mönö kukösumgi mianğö dop mem köhöim engimakñan.

<sup>17</sup> Mem köhöim enginönga ölop Kraist möt narim wañgigetka uruñine dumñi memba malma. Mewö maliga kesötñini Kraistkö urukalemnöñ möndömgöba mendawölget geiga töndangöba kinme.

<sup>18</sup> Urukalemñan nam köl engiiga könagesö sarakñi pakpak yembuk ölop Kraistkö urukalemñangö könañi möt kutume. Jöpaköm nengimakzawi, urukalem mianğö dopñi kewö: Görañi likepliket teteköñi qahö an bibihiza. Köröpñi enduyangö enduñe angaiza. Köröpñi euyangö euñe öngöza. Mewöyök dutñe emuyangö emuñe geba ahöza.

19 Kraistkö urukalemñan mönö gölmegö mötmötninanğö dopñi oñgitza. Mi möt kömumegöra kewö köulukömakzal: Anutu, gi mönö aködamungi pakpakö dop mötmöt Buñagan uruñini kokolak qeba musulungöm enğiman.”

20 Anutu mewö köuluköba kewögöra möpöseimakzal: Nini mötmötnini oñgita yuaigöra köuluköba qesibinak me jemelen imut ala mötmöribinak ewö, yañön mönö yuai mi ölop köhöiba neñgima. Anutu kukösumñan urunine nup memakzawi, yañön mönö mianğö dop köuluk aka mötmöt dopnini oñgit teköba amqeba yuai pakpak ölop ak neñgimakña. Mianğöra möpöseim wañgimakin.

21 Urumelen könagesö neñön tokoba Kraist Jisösgöra aka Anutugö qetbuñani möpöseininga aködamunñambuk aka ahöma. Mi gwöt isik ahöm köhöiba teteköñi qahö ahöba öngömei, nalö mianğoreñ mönö mewöñanök aködamunñambuk aka ahöma. Keu mi ölña.

## 4

### *Kraistnöñ mindirim neñgiğa ölñi mohot akzin.*

1 Nöñön Kembubuk qekötahöba kinda nupñi mealanğöra kösö miri azia akzal. Keu mi jim teköba uruñini keu kewö jiba kuñguzal: Anutunöñ ahakmeme aködamunñambuk aka memba malmegöra enğoholöhi, mianğö dop injini mönö malmal qainñi kun malme.

2 \*Mönö uruñini memba et ala keu bapñe anda guñböñjönjön qakñe ambazip ak enğiba malme.

---

\* 4:2: Kol 3.12-13

Lömböt mökösoṅda malme. Mönö lolongöba bölöṅaṅgö kitipṅi kude mememö, qaqaenḡiba jöpaköm aṅguba malme.

<sup>3</sup> Uṅa Töröṅan uruṅini qezaköba luaigö kösönöṅ jöhöba mindirim enḡimakzawi, iṅini mönö uru jöhöjöhö mi sutṅine ahömapkörä kapan köla kinme.

<sup>4</sup> Anutunöṅ enḡoholöhi, mianḡoreṅ mönö öröröṅ oyaenḡoyaenḡ akingö jörömḡörömṅini mohot miyök al enḡiiga al mamböta malje. Mianḡö dop iṅini mewöṅanök Kraistkö öl kempaṅi mohot aketka Uṅa Töröṅi mohotnöṅ mönö inahöm enḡiiga malme.

<sup>5</sup> Kembunini mohotnöṅ galöm köl enḡiiga öröröṅ möt narim waṅigetka o melun mohot miyöhök mem enḡigetka mohot aka malje.

<sup>6</sup> Anutunini mohotnöṅ körek iwi ak neṅgimakza. Yaṅön yuai pakpak körek neṅgoṅgita Kembu öṅgöṅgöṅi ak neṅgimakza. Mewö aka jitṅi tem kölböṅgöra körek kuṅguba inahöm neṅgiba urunini dop malmal tatat ak neṅgimakza.

<sup>7</sup> Mianḡö dop öröröṅ Kraistkö ölni mohot maljinmö, Kraistnöṅ kalem möriamṅi mokoba sihimṅaṅgö dop neṅgiyök. Nup memegö mötmöt kalem könaṅi könaṅi mi mohot mohot neṅgöra dopnine mendeṅ neṅgiiga maljin.

<sup>8</sup>\* Mianḡö keuṅi mi kewö jigetka Buṅa Kimbinöṅ ahöza,

“Yaṅön euyangöreṅ öṅgöba kinda kösö ambazip gwötpuk enḡömeiga buṅaurupṅi aketka kalemṅi kalemṅi mi ambazip neṅgöra neṅgiyök.”

---

\* **4:8:** Sum 68.18

9 “Euyangören öngöyök,” Anutunöj keu mi mönö denöwögöra jiyök? Miangö könañi kewö: Kraistnöñ mutuk Suepnöhök erök. Mönö gölme dutñe emuyangören geyök.

10 Eröhi, yanön mönö mewöyök lilingöba eu öngöyök. Öngöba Suep mirigö jakeni pakpak engongita qakñe euyangören öngöba malja. Miangören mala Suep gölmegö öröyuainiri pakpak mi ösumñan kokolak qeba jömuk dop köl teköba malja.

11 Kraistnöñ ambazip neñgöra mötmöt kalemñi könañi könañi kewö menden neñgiyök: Nupñi menden neñgiiga tosatñan melaimelai ambazip bohonñi (apostol) aket. Tosatñan kezapqetok ambazip (profet) aket. Tosatñan urukunğukunğu ambazip (ewanjelis) aket. Tosatñan lama galöm (pasta) aka kusum neñginenği böhi qaqazu aket.

12 Kraistkö ölni mi urumelen ambazip. Neñön yengö urunini nanğöinga köhököhöi miwikñabingöra nupñi mewö menden da kunğum neñgiyök. Könagesö sarakñi neñön körek urugö nupñi mendingö jöjöröm teköba malbingöra aka mewö inahöm neñgiyök.

13 Mewöña mewö nup murutñi murutñi memba mala Anutu möt nariba könañgep Nahönñi möt yaköm soroköba miangören qezaköm anğuba mohot aka kinbin. Anutugö mötmötñi aka aködamun yuaini pakpak mi mönö körekñanök Kraistkören ahöza. Neñön Kraistkö köweneyök mötmöt ösumñi öröinga musulungöm neñgiiga qarim sehiba köhöiba malinga aködamunñi köl neñgii körek asuhui malbin.



14 Toroqeba namande tandök malbinbuköra Kraistnöj urunini kuᅅguba nanᅅi ewö aködamininambuk akingöra inahöm neᅅgimakza. Namande tandök malinga qewöloᅅ ambazipnöᅅ areᅅ i me wai ala möndöba tutuhum neᅅgigetka tala et neᅅguyöhi, inᅅini mönö miangö dop aka laᅅ malbepuk. Luhutnöᅅ lilikqilik qeiga köwetnöᅅ kunduriga sirinöᅅ gödöwöröt laᅅ waᅅgiriga an qem kam qem aka simbiᅅsambaᅅ ahakza. Miangö dop gölme ambazipnöᅅ silenöᅅ alal aka unᅅi memba tilipmötmöt miwikᅅaiba ambazip laᅅ kusum eᅅgigetka janᅅuᅅ ahakze.

15 Miangö dop laᅅ kude malmemö, keu ölnanök töp jiba jöpaköm aᅅguba malme. Mewö mala Kraistnöᅅ nöropnini akzawi, kesötᅅini mönö yaᅅgöreᅅ möndömgöget geiga töndangöba yuai pakkak miangöreᅅ qarim köhöiba aködamininambuk aka malme.

16 \*Kraistnöᅅ nöropnini aka ölnᅅi jömuhök galöm köl neᅅgiiga ginimuramᅅi köreᅅᅅan mönö ölnaᅅgö köna böroᅅi mindiriba jöhöm neᅅgigetka kutulaᅅgömakzin. Ösum mohot mohot ahöm neᅅgizawaᅅgö dop mönö nupnini memba kötöngöba jöpaköm aᅅguinga ölnᅅi mianᅅön köhöiba qarimakza. Mewö.

*Asakᅅaᅅgö ahakmeme dölokᅅi aka memba malme.*

17 Mewö akzinaᅅgöra nöᅅön Kembugö jitᅅe memba galöm meme keu kewö jibi möt yaköme: Urumelaᅅgö kopa ambazip uru mötmötᅅini sohoiga nesak ewö aka öne omanᅅi laᅅ malakzei, inᅅini

---

\* 4:16: Kol 2.19

yengö tandök bölöni kude toroqeba aka memba malme.

<sup>18</sup> Urumelenjö kopa ambazip yengö urumötmötñinan söñauiga Anutubuk malmalgöra siksauk aka sohoze. Mötmöt bölönan uruñini gwözönda duhuyöhangöra aka gukmaulem aka tönpin malje. Mianjöra Anutugören malmal köhöikne qahö qekötahömakzemö, nanñinök lañ töhön malje.

<sup>19</sup> Galömnini qahö mem angugetka uruñini gwözöñ teköiga gamu tanğen malje. Uruñini kaiseroneñ jöhöba qewölon yuaigöra lañ söngaiba tölöhomakze. Yuai membagun memingö nepaqepalok köpösöngömakze.

<sup>20</sup> Yenön mewö ahakzemö, inini Kraistpuk malmalgö könañi mi mewö qahö kusum enğiget mötket.

<sup>21</sup> Inini keu ölnangö Tonji Jisösbuk qekötahögetka mianjö dop könañi kusum enğigetka ölni kewö möt yaköget:

<sup>22</sup> \*Mutuk ahakmemeñini walñi wuatangögetka sihim kömbönañini bölönan isimkakalek ak enğiiga ayuhum anğubingö aket. Köna kusum enğiget mötkeri, mianjö dop mönö uruñini walñi meteköm gila andö geme.

<sup>23</sup> Urumötmötñini mem guliget kölöñaiba malmegöra köna kusum enğiget.

<sup>24</sup> \*Anutunöñ nini nanñi kaisöngolomñangö dop sarakñi aka mal köhöibingöra miwikñaim nenğiyök. Uru dölökñangö malmal solanñi wuatangöbingöra mönö al nenğiyök. Mianjöra uru dölökñi miyöhök

---

\* **4:22:** Kol 3.9      \* **4:24:** Jen 1.26; Kol 3.10

mönö bök kölget geiga malme. Köna mi mönö mewö kusum engigetka möt yaköget.

25 \*Köna mewö ahöiga nini Kraistkö ölni mohot miangö uruñe darumun ewö mindiriba ala-ala aka maljin. Miangöra muneñ mi mönö meteköm gilget geiga sutñine keu ölnanök pakpak eraum möta malme.

26 \*Tembula kukpiriñnönñ akñe ewö, mönö töndup singisöndok kude akñe. Irimñini seholimawi, keuñini mi mönö zilañ wehön jeñan qahö teköba geiga jim tekögetka solanima.

27 Mewö Bölönangö Toñan sutñine kañgotpapuköra qeapköba nalö kun kude wañgiba zilañ yakörime.

28 Kunñan yonñgorö meme malöhi, yañön mewö kunbuk kude akña. Mewö qahöpmö, mönö nanñi börönan nup kapañ köla memba malma. Nup memba nanñi nene inapñi miwikñaiba ölop anqeba ambazip wanapñi nañgöm engimakña.

29 Keu lösö kun jitñineyök kude etmapmö, keu ambazip uruñini nañgöba mem köhöimawi, mönö miyöhök jiba malme. Ambazip keuñini möta uruñini ahözawañgö dop qambañgöra osizei, mönö miangö dop goro engigetka keu nahömñi möta ölöwakeak.

30 Anutunönñ buñaurupñi sohohnini meiga Suepnönñ öngöbini, nalö miangöra aiwesökñi kömbönañi mekötahöm enñiiga uruñine geba Anutugö muñgemñi akza. Miangöra Anutugö muñgemñi Uña Törönñi mi mönö wösöbirik kude qem wañgime.

---

\* 4:25: Zek 8.16      \* 4:26: Sum 4.4

31 Inini mönö urukömbuk, urukondum aka urusingok pakpak mi qeköba gilget köröwen tatma. Urukönöpnöñ kude jula engohoiga uruñinan auba yom qeta jim angubepuk. Mewöyök andöqeçe keu töhöreñ mi kude jime. Angöjörak könañi könañi uruñini tölöhubapuköra mi mönö körek andö qegetka tikep ahöma.

32 \*Tikep ahömapmö, ala-ala ak anguba mököliba gunböñjönjön qakñe ak anguba malme. Kraistpuk qekötahögetka Anutunöñ siñgisöndokñini mosöta sanğon enğiyöhi, inini mönö miangö dop toroqeba köpösilitñini mosöt anguba malme. Mewö.

## 5

### *Anutugö asakñe malmal mi kewö:*

1 Anutugö wölböt nahönböraturupñi akzeangöra silikñini mönö kapan köla Anutunöñ ahakzawangö dop aka wuatangöba malme.

2 \*Kraistnöñ jöpaköm neñgiba malmalñi neñgöra aka köleñda mosörök. Jöwöwöl ohogetka köwakñan öngözapma, Anutunöñ miangö dop Kraist malmalñangö kalemñi mi möt angön köli wöronñi umköhöwakñambuk ewö aka yangö jeñe pukpuköiga söñgaiyök. Inini mönö mewöyök urukalemnöñ kinda Kraistkö dop jöpaköm anguba aka memba malme.

3 Serowilin, qewölon angöjörakñambuk könañi könañi me yuai membagun memingö nepaqepalok (gridi) silikñi mi Anutugö jeñe qahö dop kölja. Miangöra Anutugö ambazip sarakñi

---

\* 4:32: Kol 3.13      \* 5:2: Eks 29.18; Sum 40.6

akzeangö dop yuai mewöñangö keunji kun mi sutñine kude misiriba jigetka mötme. Saumban!

<sup>4</sup> Angögönahitnönj lösö keu imbilonjonambuk aka uruqahö keu sinñi sinñi mi kude jime. Mianñon uruñini tölöhoiga qahö dop kölja. Miangöra mi mönö mosöt teköba möpömöpösei keu jim sehiba malme.

<sup>5</sup> Keu kötnji ki mönö möt kömume: Kunñan serowilin me qewölonj angjöörakñambuk me membagun membingö nepaqepalok köpösöñgömakzawi, yañön mönö Anutugö bemtohoñi buña qem angumangö osima. Ahakmeme mianñon bem muneñi me tandö lopionj möpöseim engimakzeangö tandökñi akza. Mewö akzawañön mönö Kraist aka Anutu yetkö bemtohoñ uruñe angotpingö osima.

<sup>6</sup> Anutunönj sinñisöndok mewöñangöra aka tembula irimsesewölñi qeqetal ambazip yengö qakñine ali öngömakza. Miangöra kunñan keu omañi mewöñi jiba kelök ala tutuhuba tilipköm engibapuk.

<sup>7</sup> Miangöra ambazip mewöñi mönö andö enguba yembuk köisirik kude malme.

<sup>8</sup> Mutuk söñaupuk malgetmö, nalö kewöñe Kembubuk qekötahöba kinda yañgö asakñambuk malje. Ahakmemeñini mönö asakñangö buñaya akzeangö dop aka memba malme.

<sup>9</sup> Asakñangö buña akzeangö töhötmöriam ölnji mi kewö: Injini ahakmeme ölopñi wuatangögetka Anutunönj keunñi jim teköi solanime aka keu öl töhöññanök jiba malme.

<sup>10</sup> Wani yuai Kembangö jeñe dop kölmawi, miangö könañi mönö jaruba kewöta möt asarime.

<sup>11</sup> Söñaupkö ahakmeme gilipitñi (ambetakñi) aka memakzei, yembuk mönö köisirik kude toroqeba malme. Yeñgö bölöñamñini mi mönö indela asakñe ala jim engime.

<sup>12</sup> Tosatñan singisöndok tölapñe ahakzei, mi mönö aukñe jibingö gamuñambuk akapuk.

<sup>13</sup> Anutugö asakñan singisöndokñini pakpak mem asariğa könañamñini öññan mönö aukñeyök asuhuma.

<sup>14</sup> Asakñangö Tonñan mönö tölapñangö yuaini pakpak indeliga asakñe aukñeyök ahöma. Mianğöra keu kun kewö jigetka ahöza, “Gaun ahözani, gi mönö imbigi mötnöñ. Mönö köhömuñeyök guliba wahötnöñga Kraistnöñ mem asarım gihima.”

<sup>15</sup> Keu mianğö dop ahakmemenini mönö mötkutukutu qakñe aka memba malme. Morop aka tönpin malbepuköra mönö ölöpñanök galöm mem anguba malme.

<sup>16</sup> \*Kewöñe nalö bölizawañğöra aka urugö nup mbingö köna kun ahumawi, nalö mi mönö kude mösöhöba ayuhumemö, ambazip qöhöröñine anda ösöñ qambañ köl engime.

<sup>17</sup> Mianğöra uruqahö ewö lañ kude malmemö, Kembugö jitsihitñi mi ölöpñanök möt asariba kinme.

<sup>18</sup> Wain o köhöikñi namba enololon akepuk. Nanñini imbi-imbi malgetka mötmötñini bölöñan asuhugetka söñaup malmalnöñ titeköba geba ayuhubepuk. Mianğöra enololon akepukmö, Uññan Töröñan mönö uruñini kokolak qemapköra kapan köla kinme.

---

\* 5:16: Kol 4.5

19 \*Mönö Buᅇa keu eraum möta Sumbara (sam), möpömöpösei liᅇet (omsa) aka urugö liᅇet tosatᅇi mi urukönömᅇinan köla Kembu möpöseimakᅇe.

20 Mewö me mewö asuhuiga miangöra mönö Kembunini Jisös Kraistkö qetᅇi qeta Iwi Anutu sundan saiwap jim wangiba malme. Mewö.

*Awanöm yeᅇgö goro qambaᅇ keu*

21 Kraistkö jitᅇi oᅇgitpepuköra keᅇgötᅇini möta mönö sutᅇine keu bapᅇe anan ak anguba malme.

22-23 \*Kraistkö öᅇᅇi mi urumelenᅇ könagesö. Yaᅇön miangö nöröpᅇi aka Amötqeqe Tonᅇi akza. Miangö dop azinöᅇ mewöyök anömᅇangö nöröpᅇi akza. Miangöra ambi iᅇini mönö Kembugö keu bapᅇe anangö dop nanᅇini apurupᅇini göda qem eᅇgiba keuᅇini bapᅇe anda malme.

24 Urumelenᅇ könagesö neᅇön Kraistkö keu bapᅇe kinᅇini, miangö dop ambi eᅇön mewöyök mönö apurupᅇinaᅇgö keu pakpak wuatangöba malme.

25 \*Kraistnöᅇ nanᅇi könagesöᅇi jöpaköm neᅇgiba neᅇgöra aka malmalᅇi tököba köleᅇnöhi, miangö tandök azi eᅇön mönö mewöyök anömurupᅇini jöpaköba urukalem ak eᅇgiba malme.

26 Kraistnöᅇ könagesöᅇi Buᅇa keuᅇan tök kutuba ambi buᅇaᅇi sarakᅇi akingöra o ewö mianᅇön sanᅇonda mösoloᅇanim neᅇgiyök.

27 Yaᅇön nini öᅇlulup sorok akingöra möta uru sönuetnini mösoloᅇaniba töwöt boromᅇi kun qahö akingöra kapaᅇ kölakza. Könagesö sarakᅇi köpösihitkö keunini qahö akingöra mörakza. Kraistnöᅇ kaba neᅇguanᅇiriga asakmararaᅇe

\* 5:19: Kol 3.16-17

\* 5:22-23: Kol 3.18; 1 Pitö 3.1

\* 5:25: Kol

3.19; 1 Pitö 3.7

eu angoringa jihilalomnan nenjuiga ambi buñani ewö nini nanñi jemesoholje al nenjuiga aködamuninambuk kinbin.

28 Azi inini mewöyök mönö Kraistkö tandökñi mewöñi wuatangöba anömurupñini jöpaköm engiba malme. Anömñi jöpakömakzawanön mönö nanñi köyan köl anğumakza. Mianğöra nanñini silenini köyan köl anğumakzeangö tandök mönö anömurupñini köyan köl engigetka dop kölma.

29 Kunñan kun nanñi silenini nalö kunöñ kazik qahö ak wanğiyökmö, körek neñön silenini gumohoba köyan kölakzin. Kraistnöñ mewöyök könagesöurupñi nini silenini ewö keunñan gumohoba köyan köl nenğimakza.

30 Urumelen könagesö neñön Kraistkö ölni akzin. Neñön Kraist ölnangö törömunñi aka maljin. Mianğöra gumohom nenğimakza.

31 \*Buña keu kun kewö ahöza, “Mianğöra azinöñ mönö iwinamñi etkömosöta anömñambuk qekötahöba yahöt yetkön silemohot aka malmahot.”

32 Keu mi söpsöp keu tölapñi. Mi Kraist aka urumelen könagesö nenğö uru jöhöjöhöninangöra jiba ohozal. Keu aren mianğö könanñi mi tölapñi aka dutñi gegeni.

33 Mewö akzapmö, engöra keu mi kewö jizal: Inini mohot mohotñan mönö mewöyök anömurupñini nanñini köyan köl anğumakzeangö dop jöpaköm engiba malme. Anöm enön mönö mewöyök apurupñini göda qem engiba malme. Mewö.

---

\* 5:31: Jen 2.24



## 6

### *Nahönbörat aka iwinam yenjö uru jöhöjöhö*

<sup>1</sup> \*Nahönbörat engören ahakmeme diñdini mi kewö: Inini mönö Kembubuk qekötahöba iwinamyahötñini yetkö jitñiri tem köla wuatängöba malme.

<sup>2</sup> \*Anutunön jöjöpañ keu 1-2-3 miengö teteköñe töwa likepñi neñgimangö qahö jii ahözapmö, jöjöpañ keu jañgö 4 mi törömunñambuk. Mutuk kewö jiza, “Iwinamyahötñi mönö göda qem etkiba malman.” Keu mi tem kölinga Anutunön töwa likepñi neñgimangö keuñi kewö jöhöi ohoget ahöza,

<sup>3</sup> “Göda qem etkinöñga Anutunön töhötmöräm gihiiga toroqeba gölmenön nalö köröpñi malman.”

<sup>4</sup> Nahönböraturupñinan irimsesewöl akepüköra iwi enön mönö urukanjam kude ak engiba malme. Mewö qahöpmö, Kembangö Köna keu tem kölmegöra kusum engiba miangö dop mindingöm engigetka qarime. Mewö.

### *Welenqeqe aka galöm yenjö qambañ keuñini*

<sup>5</sup> \*Welenqeqe inini mönö gölme qakñe galömurupñini yenjö keuñini Kraistkö keu ewö tem köla jöranñtauat kude ahakñe. Keuñini ongitpepüköra sömbuñini möta jönömñinambuk undui malme. Urugenmoñ kude aka böñ kinda aka memba malme.

<sup>6</sup> Köndöwoñ aketka ambazipnön engkek sorimegöra qahöpmö, uruñini nupnön ala

---

\* **6:1:** Kol 3.20    \* **6:2:** Eks 20.12; Dut 5.16; Kol 3.21    \* **6:5:** Kol 3.22-25

memba Anutugö jitsihitji wuatangöba Kraistkö welenqege tandök ahakje.

<sup>7</sup> Gölme ambazip welen qem engiba mewö mi-añön Kembangö welenji qemakzin. Mewö möta nupñini mönö Kembangö jeje dop kölmawanjö dop uruölöwakupuk memba malme.

<sup>8</sup> Keu ki mönö mötme: Engö sutñine tosatñan nup tonji malje aka tosatñan tonjini töwa qahö öne welen qem engiba etqeqeñi malje. Mi töndup denike yeñön nup ölöñji mi me mi memakzei, Anutunöñ mönö mianjö töwanji al enjiiga buña qem angume. Keu mia mönö mötmöriba malme.

<sup>9</sup> \*Tourup aka welenqege engö Kembangö mo-hot yanön Suep mire malja. Yanön ambazip tosatñi qahö engek soriba tosatñi qahö qepureim enjimakzapmö, dop mohotnöñ kewöta keunini jim teköm neñgima. Galöm injini mi möt kutuzeangöra mönö welenqege alaurupñini simin titit ölöñji dop mohot ak engiba öröm könöpkönöp memtöröp qemtöröp mosöta malme. Mewö.

*Anutugö jurujamba jömuk memba malme.*

<sup>10</sup> Kimbini tekömangö aiga keu kewö ohozal: Injini Kembangö qekötahöba kingetka kukösumñi ketanjan mönö inahöba töngum enjiiga köhöimakje.

<sup>11</sup> Bölöñangö Tonjan silenöñ alalgö mötmöt areñ könañi könañi alakzawi, injini mi mesohol köla kin köhöimegöra mönö Anutugö wahijamba pakpak memba kölget gem angum teköiga malme.

<sup>12</sup> Nini gölme ambazip sep busuñinambuk yembuk bim qahö aumakzinmö, bem suahö galöm aka iwiluhut bölöñi bölöñi tuarenjon ak engibingöra

\* 6:9; Dut 10.17; Kol 3.25; 4.1

kinjin. Bem suahö galöm bölöni Suep gölme sutñire jakömbuak dumñine kinda kembu ahakzei, mönö mi qetal engimakzin. Mewöyök pom böhi öngöngöni eretñi sutnine panamangö öme tohongö azi ipñi mala öroyuai pakpak galöm kölakzei, neñön mönö yembuk yarö gilakzin.

<sup>13</sup> Mianğöra tuarenjon ak engibingöra mönö Anutugö jurujamba lökñanök memba kölget gem anğuga kinme. Mewö kingetka kerökñinan nalö bölöñe engubingö gangömakñei, nalö mianğoreñ mönö ölop amqeba yarö gila tötal engime aka yarö mi teköiga ölop miri gölmeñine kanjam köla kinme.

<sup>14</sup> \*Wahijambañini mönö kewö löngöt anğume: Keu ölnanök jijigö irimunğani mönö anjönine jöhöba kinme. Ahakmeme solan sorokñi mi töptöpñine göwanğowañ (kapa maluku) ewö köla sel jöhöm anğuba kinme.

<sup>15</sup> \*Köna esu böñtöñök löngöta ölop töndangöba tiba anakzin. Mianğö dop inini mönö luaigö Buñani jim sehibingö jöjörögetka mianön bohon köl engima.

<sup>16</sup> Jurujamba miembuk toroqeba saiwa bohonñi qetñi mötnarip mi mönö buña qem anğuba sundan tengöba kinakñe. Bölöñanğö Toñan neñgeriba qönsihim neñgimangöra möta timbi liñgipñi mulahakzawi, mianğö esapesap könöpñi pakpak mönö suman mianön qeapköba anğön köl anğumakñe.

<sup>17</sup> \*Anutugö Amötqeqe Toñi i mönö buña qem anğume. Buña qem anğuba kunbuk letotmei, domamöt mianön mönö nöropñini ain irikmarik ewö turuba anğön köl engimakña. Uña Töröñan bimgö

\* **6:14:** Ais 11.5; 59.17    \* **6:15:** Ais 52.7    \* **6:17:** Ais 59.17

sou ketanji nenġizawi, mi Anutugören Buña keu. Mi mewöyök mönö buña qem aŋguba urukönömñine ala bimñini mianjön qemakñe.

18 Wahöjambañini pakpak mi löngöt aŋguba mönö nalö dop Anutu köuluköba qesiba malme. Uña Töröñan enġuasöta inahöm enġimakzawaŋgö dop mönö uletnöñ sahöt waŋgimakñe. Mönö pöndañ uruguliguli mala sundan Anutugö ambazip sarakñi pakpak yengöra aka kapañ köla köulukömakñe.

19 Nöñgöra mewöyök kewö köulukömakñe, “Anutu, gi mönö keu kötni diñdiñi Pol waŋginöñga göhö Ölöwak Buñagi tölapñi mi keu jitñan jimawaŋgö dop jim asariba awösamkakahök kinda uru kuŋgum enġimakña.”

20 Nöñön Ölöwak Buña mianğöra aka Anutugö jitñememe azi bohonñi akzalmö, nupñi memakzalaŋgöra aka nalö kewöñe kösö mire tatzal. Mianğöra Buña keu mi Anutugö jeñe dop kölmawaŋgö dop awösamkakahök jiba malmamğöra mönö köuluköba malme. Mewö.

### *Yaizözkök keu teteköñi*

21 Wölböt alani Tikikus yañön nöñgö kösohotni alma. Yañön Kembubuk qekötahöba nupñi memburik-qemburikñi qahö memakza. Kiaŋgören denöwö aka memba tarakzali, mi pakpak jiiga inini mewöyök mi mötme.

22 Neñön denöwö maljin tatzin, inini kösohot mi mötmegöra Tikikus melaim waŋgibiga Efesus enġören kama. Yañön kaba urukölalep enġiiga ölop böñjön malme.

<sup>23</sup> Iwi Anutu aka Kembu Jisös Kraist yetkön mönö urumelenj alaurup engörenj luai qeba urukalem ak engiba mötnaripñini mem köhöimakña.

<sup>24</sup> Ambazip Kembunini Jisös Kraist nalö teteköñi qahö jöpaköba malmei, Anutugö kalem möriamñan mönö körek embuk ahöba ahöm öñgöma. Mewö.

**Burum-Mindik Bible**  
**The New Testament and portions of the Old Testament**  
**in the Somba-Siawari language of Papua New Guinea,**  
**also called the Burum Mindik language.**  
**Sampela hap Buk Baibel long tokples Burum Mindik**  
**long Niugini**

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

---

PDF generated using Haiola and XeLaTeX on 18 Apr 2025 from source files dated 31 Aug 2023

c0871260-68cc-5a50-953f-52200e105d1e